



SURUHANJAYA INTEGRITI AGENSI PENGUATKUASAAN
ARAS 5, BLOK MENARA, BANGUNAN MENARA USAHAWAN
PERSIARAN PERDANA, PRESINT 2
62652 PUTRAJAYA, MALAYSIA
Tel: 03-8880 5650 / No. Faks: 03-8880 5646



LAMAN WEB: www.eaic.gov.my

PENGARANG, MEJA BERITA

UNTUK SIARAN SEGERA

KENYATAAN MEDIA

DAPATAN SIASATAN EAIC KE ATAS KEMATIAN S. BALAMURUGAN SEMASA DALAM TAHANAN POLIS

Putrajaya 18 Januari 2018 - Suruhanjaya Integriti Agensi Penguatkuasaan atau *Enforcement Agency Integrity Commission* (EAIC), selaras dengan kehendak seksyen 30(5) Akta Suruhanjaya Integriti Agensi Penguatkuasaan 2009 [*Akta 700*], dengan ini mengumumkan keputusan pendengaran awamnya ke atas kematian Balamurugan A/L M.Suppiah (S.Balamurugan, si mati) semasa dalam tahanan Bahagian Siasatan Jenayah, Ibu Pejabat Polis Daerah Klang Utara pada 7 Februari 2017.

Tiga (3) sesi pendengaran awam telah dijalankan tahun lalu iaitu pada 15 - 18 Mei, 5 - 8 Jun dan 10 - 11 Julai 2017 di Putrajaya. Pendengaran awam yang dipengerusikan oleh Yang Arif Datuk Yaacob Haji Md. Sam (Mantan Pengerusi EAIC) bersama tiga Pesuruhjaya EAIC iaitu Dato' Sri Robert Jacob Ridu (Mantan Pesuruhjaya), Encik Lee Sow Siong dan Puan Leong May Chan turut dihadiri oleh peguam pemerhati daripada Majlis Peguam Malaysia, peguam yang mewakili keluarga si mati serta wakil daripada KDN, PDRM dan SUHAKAM.

Pendengaran awam tersebut telah dijalankan berdasarkan terma rujukan yang ditetapkan oleh pihak Suruhanjaya melalui Pasukan Petugas yang ditubuhkan di bawah seksyen 17 Akta 700.

Seramai 46 orang saksi telah dipanggil memberi keterangan di sesi pendengaran awam tersebut manakala 108 ekshibit termasuk laporan bedah siasat, gambar-gambar dan dokumen-dokumen berkaitan Balai Polis Bandar Baru Klang, Ibu Pejabat Polis Daerah Klang Utara dan Lokap Berpusat Shah Alam, Perintah Tetap Ketua Polis Negara (PTKPN), Prosedur Operasi Standard (SOP), arahan-arahan tetap serta lain-lain dokumen yang relevan telah dikemukakan bagi tujuan pendengaran awam tersebut.



Ringkasan kepada penangkapan dan keberadaan si mati dalam tahanan PDRM adalah seperti berikut:

1. Pada 6 Februari 2017 lebih kurang pukul 6.30 petang, si mati bersama-sama dengan Ang Kian Kok (SP1) dan Tamilsan a/l Karapiah (SP17) telah ditahan oleh anggota Unit Rondaan Bermotosikal (URB) Balai Polis Bandar Baru Klang di Jalan Batu Belah, Klang kerana kereta yang dinaiki mereka disyaki terlibat dalam kes samun kenderaan.
2. Si mati dan 2 yang lain kemudiannya telah dibawa ke Balai Polis Bandar Baru Klang dengan menggunakan kereta peronda dan juga kereta yang dirampas untuk dibuat satu laporan tangkapan.
3. Lebih kurang pukul 7.45 malam, anggota dan pegawai daripada Bahagian Siasatan Jenayah IPD Klang Utara iaitu SP21, SP22, SP23, SP24, SP25 dan SP26 dan seorang pegawai daripada Bahagian Siasatan Jenayah IPD Klang Selatan iaitu SP27 telah tiba di Balai Polis Bandar Baru Klang untuk menemubual ketiga-tiga orang tangkapan tersebut.
4. Keterangan daripada saksi-saksi mendapati terdapat insiden kekerasan berlaku pada waktu ini. SP1 dan SP17 yang telah ditahan bersama-sama si mati telah melihat SP27 telah menampar si mati di bahagian muka dan juga menumbuk si mati di bahagian dada selain mengeluarkan kata-kata "*luar you kepala dalam saya kepala*". Perkataan 'kepala' ini merujuk kepada ketua gengster atau samseng.
5. SP5 dan SP6 turut mendengar bunyi jeritan seperti dipukul dan bunyi jeritan meminta tolong sewaktu menyediakan laporan polis di Bilik Cawangan Pencegahan Jenayah. SP2 dan SP3 turut mendengar bunyi jeritan dengan nada sakit oleh si mati sewaktu berada di ruang Kaunter Inkuiri Balai Polis Bandar Baru Klang.
6. Lebih kurang pukul 8.15 malam, SP1 telah dibawa ke Banting oleh anggota dan pegawai Bahagian Siasatan Jenayah IPD Klang Utara untuk menahan seorang lagi suspek. Si mati dan SP17 kemudiannya telah dibawa ke IPD



- Klang Utara pada pukul 10.45 malam dan ditempatkan di Ruang Khas OKT di Pejabat Detektif, Bahagian Siasatan Jenayah, IPD Klang Utara.
7. Pada 7 Februari 2017 lebih kurang pukul 3.45 pagi, si mati bersama dengan 5 orang lagi telah diserahkan kepada Lokap Berpusat Shah Alam dan telah ditempatkan dalam satu sel yang sama. Pada 8.45 pagi, si mati dan yang lain telah dibawa ke Mahkamah Majistret Klang untuk urusan permohonan reman.
 8. Permohonan reman terhadap si mati telah ditolak oleh Majistret kerana si mati berada dalam keadaan lemah dan tidak sihat. Majistret juga telah mengarahkan si mati dibawa ke hospital untuk mendapatkan rawatan.
 9. Walau bagaimanapun, si mati telah dibawa pulang ke Bahagian Siasatan Jenayah, IPD Klang Utara bersama-sama dengan OKT yang telah dibenarkan permohonan reman lebih kurang pukul 1.00 petang. Si mati kemudiannya telah ditempatkan di ruang legar Pejabat Detektif manakala OKT lain telah diletakkan di dalam Ruang Khas OKT.
 10. SP37 telah menghubungi pegawai penyiasat si mati iaitu SP19 dan memaklumkan bahawa si mati berada dalam keadaan lemah. SP19 kemudiannya telah memaklumkan bahawa beliau masih menunggu arahan daripada SP28.
 11. Kemudian, SP28 telah memberikan arahan melalui aplikasi *WhatsApp* untuk menahan semula si mati kerana disyaki terlibat dalam kes lain pada pukul 4.39 petang dan SP46 turut memberikan arahan yang sama pada pukul 6.05 petang. Walau bagaimanapun, tiada apa-apa laporan polis berkaitan diberikan kepada SP19 dan tiada laporan tangkapan baru dibuat oleh SP19.
 12. Lebih kurang pukul 7.00 malam, si mati didapati telah terkencing di dalam seluar. Si mati kemudiannya telah dibersihkan dan ditukarkan pakaian oleh OKT lain. OKT lain telah diarahkan untuk meletakkan si mati di dalam Ruang Khas OKT sebelum mereka dibawa ke Lokap Berpusat Shah Alam.
 13. Lebih kurang pukul 11.00 malam, SP19 telah mendapati si mati tidak sedarkan diri di dalam Ruang Khas OKT. Bantuan perubatan telah diminta dan pemakluman kepada pegawai atasan telah diberikan oleh SP19.



14. Pada 8 Februari 2017 lebih kurang pukul 12.10 tengah malam, Pembantu Perubatan telah mengesahkan bahawa si mati telah meninggal dunia. Lebih kurang pukul 5.00 pagi, Koroner telah tiba dan telah membuat pemeriksaan bersama-sama dengan Pasukan Forensik IPK Selangor. Koroner kemudiannya mengarahkan agar satu bedah siasat dijalankan.
15. Bedah siasat kemudiannya telah dijalankan oleh Pakar Perubatan Forensik pada pukul 10.00 pagi di Hospital Tengku Ampuan Rahimah, Klang dan mendapati punca kematian si mati adalah **coronary artery disease with multiple blunt force injuries**. Tambahan lagi, corak kecederaan ini tidak terjadi secara kemalangan mahupun ditimpakan oleh diri sendiri.
16. Keluarga si mati kemudiannya telah memohon kepada Mahkamah Tinggi Shah Alam agar bedah siasat kedua dijalankan. Mahkamah kemudiannya memerintahkan Hospital Kuala Lumpur untuk menjalankan bedah siasat kedua melalui satu perintah bertarikh 15 Februari 2017.
17. Bedah siasat kedua kemudiannya telah dijalankan oleh Pakar Perubatan Forensik Hospital Kuala Lumpur pada 18 Februari 2017 dan mendapati punca kematian si mati adalah **coronary artery disease with multiple blunt force injuries** dan corak kecederaan yang didapati tidak ditimpakan diri sendiri mahupun terjadi secara kemalangan.

HASIL DAPATAN EAIC

Keterangan dokumentar dan juga keterangan saksi-saksi menunjukkan punca kematian dalam istilah perubatan adalah **coronary artery disease with multiple blunt force injuries**. Perkara ini telah disahkan oleh dua orang Pakar Perubatan Forensik daripada Hospital Tengku Ampuan Rahimah, Klang dan Hospital Kuala Lumpur melalui 2 sesi bedah siasat yang dijalankan pada 8 Februari 2017 dan 18 Februari 2017.

Perkara ini turut dinyatakan dalam keterangan saksi SP1 dan SP17 yang telah melihat si mati ditampar di bahagian muka dan ditumbuk di bahagian dada. Keterangan daripada SP2, SP3, SP5 dan SP6 yang telah mendengar bunyi jeritan



sakit dan jeritan meminta tolong daripada ruang di belakang Kaunter Inkuiri Balai Polis Bandar Baru Klang.

Sehubungan ini Suruhanjaya mendapati terdapat perbuatan atau perlakuan kekerasan telah dilakukan oleh pegawai dan anggota PDRM yang boleh dikaitkan dengan, atau menyebabkan, kematian si mati semasa dalam tahanan PDRM.

Oleh yang demikian, Suruhanjaya mengesyorkan pihak Jabatan Peguam Negara (AGC) menimbangkan pertuduhan jenayah dibawa ke atas pegawai-pegawai dan anggota-anggota polis yang telah dikenalpasti kerana kesalahan menggunakan kekerasan ke atas si mati.

Sewaktu pendengaran awam juga, Suruhanjaya mendapati terdapat ketidakpatuhan SOP dan undang-undang sedia ada oleh pihak polis semasa membuat tangkapan dan penahanan terhadap tahanan juvana (yang ditahan bersama-sama si mati) pada 6 Februari 2017 iaitu dengan menggari mereka dan menempatkan mereka di dalam satu sel yang sama dengan tahanan dewasa.

Suruhanjaya mendapati CCTV di Balai Polis Bandar Baru Klang hanya bersifat *dummy* dan tidak dapat merakam. Hal ini telah menghalang Suruhanjaya daripada mendapatkan *best evidence* bagi melihat insiden yang terjadi sewaktu si mati ditahan di Balai Polis Bandar Baru Klang.

Suruhanjaya mendapati kegagalan pihak polis melepaskan si mati setelah permohonan reman ditolak oleh Majistret adalah salah laku yang serius kerana tidak mematuhi perintah Mahkamah. Pihak polis juga gagal mematuhi arahan Majistret supaya si mati dihantar ke hospital dengan kadar yang segera.

Suruhanjaya mendapati SP46 dan SP28 telah melakukan salah laku yang serius iaitu menyalahguna kuasa dengan mengarahkan si mati ditangkap semula tanpa justifikasi yang sah. SP19 kemudiannya telah menahan dan tidak membebaskan si mati tanpa menerima apa-apa laporan yang dapat mengaitkan si mati dengan mana-mana kes serta ketiadaan laporan tangkapan baru terhadap si mati.



SURUHANJAYA INTEGRITI AGENSI PENGUATKUASAAN
ARAS 5, BLOK MENARA, BANGUNAN MENARA USAHAWAN
PERSIARAN PERDANA, PRESINT 2
62652 PUTRAJAYA, MALAYSIA
Tel: 03-8880 5650 / No. Faks: 03-8880 5646



LAMAN WEB: www.eaic.gov.my

Suruhanjaya mendapati terdapat kegagalan anggota dan pegawai Balai Polis Bandar Baru Klang, IPD Klang Utara dan Lokap Berpusat Shah Alam dalam mematuhi Perintah Tetap Ketua Polis Negara (PTKPN) dan juga Prosedur Operasi Standard (SOP) dalam sepanjang mengendalikan si mati dan tahanan lain.

Kegagalan pematuhan ini melibatkan proses sewaktu pengendalian si mati dan tahanan-tahanan lain serta proses pengendalian dokumen-dokumen yang mampu menjejaskan siasatan kes terhadap si mati dan tahanan lain serta siasatan Laporan Mati Mengejut.

Suruhanjaya mendapati ruang khas OKT di Bahagian Siasatan Jenayah di IPD Klang Utara telah digunakan sebagai lokap tidak diwartakan. Ini telah melanggar Kaedah-Kaedah Lokap 1953, Akta Penjara 1995 dan PTKPN Bahagian A '118' serta penahanan OKT di ruangan tersebut boleh dianggap penahanan secara salah oleh pihak polis.

Suruhanjaya memandang serius terhadap insiden kekerasan terhadap tahanan dan ketidakpatuhan SOP yang telah dinyatakan dalam laporan ini. Suruhanjaya telah mengemukakan kelemahan-kelemahan dan ketidakpatuhan ini kepada pihak-pihak yang bertanggungjawab untuk penambahbaikan serta tindakan lanjut mereka.

Suruhanjaya dengan ini menyeru semua pihak yang terlibat dalam pengendalian tahanan dalam lokap menjalankan tugas berdasarkan kepatuhan kepada SOP serta amalan integriti tanpa kompromi.

-TAMAT-

DATUK A. AZIZ A.RAHIM

Pengerusi

Suruhanjaya Integriti Agensi Penguatkuasaan (EAIC)

18 Januari 2018